

居  
易  
齋  
吟  
州



居易齋吟草

天津 華亭 鶴立

咏梅

雪後寒梅放鐙前瘦影橫敝廬春一點香案月三更對  
坐心俱靜偕眠氣亦清花中多逸品良夜詠詩情

除夕口占

今夕已除夕光陰又一年桃符千戶換爆竹萬聲連杯  
有迎春酒囊無壓歲錢兒童欣樂甚鼓腹慶堯天

醉後放懷

居易齋吟草


四十年來老戰場壯心無際海茫茫青衫愁灑淚千點  
白髮悲傾酒一觴老去詩書仍性命狂來歌笑亦文章  
眼前成敗何須問轉瞬光陰易斷腸

郊遊

漁家最好傍河居雲水鄉中樂有餘人立紅橋喧日暮  
攜籃爭買上竿魚

秋日北上

涼月逐人行高秋客北征風沙喧大野煙水破孤城遠  
浦斜帆穩空橋老樹橫夜深辭旅店喔喔聽雞鳴



邊戍

戍鼓起烽煙邊疆六月寒黃沙衰草亂白日鴈聲酸舉  
目關山小昂頭天地寬風塵何日埽弔古莫三歎

雪霽偶成示梅莊姪

新晴春鳥哢雲散風相送堦雪落殘花檐冰滴餘凍中  
庭景物閒鄰衙弦管弄得句示兒曹賢哉諸伯仲

同友人遊城南

野館酒初濃遊人醉曳筇林疎常露鳥寺遠不聞鐘花  
柳明三徑雲煙畫一峯那知春色去獨笑撫孤松

居易齋吟草

二

雨後郊遊

好雨初過後幽尋趁晚晴屐聲傳野巷雲影墜孤城芳  
草連畦長微煙隔浦生香塵飄蕩處一路夕陽明

消夏園

消夏知何處前村數畝園夕陽明野塢殘雨濕柴門院  
靜鳥能語庭幽花解言納涼醒午夢蝴蝶過荒垣

途中遇友人

風塵遠去獨蕭森忽值良朋淚滿襟馬上相逢怕開口  
一般愁緒故鄉心

江上晚遊

江邊初落日極目黯魂銷寒浦漁燈點孤村夜火燒月  
明喧收笛風靜送歸樵去去頻回首沙灘聽暮潮

題水月庵道院

道院無人處焚香入座清境幽知客少坐久看雲行徑  
曲吞花影林深擱鳥聲凭欄閒領略野鶴共忘情

無題

春色融融半畝塘北窗臥近黑甜鄉柴門半閉無人叩  
一院梨花自有香

居易齋吟草

三

海光寺晚眺

欲訪煙林寺殘陽照古門暢懷看碧落信步踏黃昏東  
雀棲孤塔歸僧話短垣雨餘遙望處屐齒破苔痕

秋暮客河西務二首

小住河西務蕭然避世譁輕帆尋水市寒日背漁家古  
戊千年跡平原一徑斜徘徊遊眺處遙望晚雲霞

一帶人煙密村坊景物賒衙中兵弄笛

叅將署前有鼓吹樓早暮均用

笛吹土人謂之細樂

門外嫗簪花寺冷疎鐘徹園荒敗柳遮欲歸

仍戀戀作客惜年華

好靜

此生惟好靜永日掩荆關野鳥向空沒浮雲同我閒敲  
棋松徑下話酒竹堂間名利都非願應知世事艱

夏日同陳懷芳甥奕棋於浣石居

日長最好試棋枰寂靜無言落子輕竹影半窗回鶴夢  
松陰一逕斷蟬鳴妙於幻處愁都却還向危時心愈平  
敲罷不知斜日沒疎簾高捲暮雲橫

秋登望河樓

秋風無限恨秋老送人行山抱吞雲勢河流落日聲無  
邊飛葉下到處亂煙生把酒登樓望蒼茫萬里情

居易齋吟草

四

和龔劍雲年長原韻

迹跡凡僚亦樂貧論君本是舊松筠如冰心血常多熱  
結俗情懷不染塵獨倚書窗肱作枕閒開小逕竹爲鄰  
蕭條非盡煙霞志天地悠悠自在身

獨流寓中

風雪交加景未殊無何客思自清娛聊將瓦甕爲冰硯  
借得花盆當火鑪夢裏吟詩醒不記鐙邊飲酒醉還呼  
淡然旅况皆稱快敢謂冰心在玉壺

秋日途中題壁

寄栖投野館日暮竟如何  
淒切雁聲急離愁鄉夢多  
夜寒生枕席霜信度關河  
卽此經行處頻年載酒過

感舊

舉杯欲飲對花慚  
此境清貧味轉甘  
五十餘年悲往事  
不堪回首夢江南

居易齋吟草

五

姪長卿

長吉

男長庚校字

華君鶴立乃春浦先生之子幼時隨宦江南卽喜吟詠  
師事張竹軒先生年十六詩文俱卓然可觀爲吳山尊  
太史賞識後於嘉慶己巳相晤於都門山尊贈楹聯云  
清白吏應有才子詩書氣不減前人鶴立奉諱歸里服  
闋應試不售因母老家貧遂棄舉子業就戶曹掾兼理  
鹽筴計畫爲朋儕推重惜中年殞謝未克展其所學詩  
稿零落茲從其猶子枚宗孝廉得居易齋吟草一卷借  
觀披讀五言如輕帆尋水市寒日背漁家晴添棲鳥亂  
寒逼爨煙低月明暄牧笛風靜送歸樵朔風鳴野店落  
日冷孤村頗得中唐風味七言如常邀明月尋仙夢不  
羨青雲謝世緣十里湖山春水綠一溪煙雨杏花紅檐  
牙鳥穴黏餘潤牆角蛛絲挂晚涼滿紙雲山皆快境四  
時花月助閒情亦有宋人意致清逸超妙可入詩話也  
道光辛丑九月吟齋弟梅成棟拜讀并識

1  
40

